

von Wulf Wager

Männer mit Toupet



Gell, mr muaß net alles v-standa, was auf dr Welt passiert ond was so Mode ischt, ond was et. Die Jonge lassat sich a Glatze rasiera ond de Alte tragat a Toupet. Glatze isch Gschmacksach, aber Toupet, des goht gar et. Warum? Weil mr des emmr sieht. Ond des macht die Toupetträger so lächerlich. Die ka mr garnemme ernscht nehma. I sag bloß Wissmann ond Bos-

bach. Aber au dr Börni Eggelston ond dr Jogi Löw ond au dr Tony Marschall standat jo em Vrdacht, Falschhaarträger zom sei.

Ja Heidanei, wenn oim d' Hoor ausgangat no muass mr halt drzua standa oder en Huat ufsetza. Aber so a om-drehts Vogelnescht wirkt oifach lächerlich.

Dr bekannteschte Toupetträger isch jo dr amerikanische Präsident Donald Trump. Der hot a Kamelschamhoortoupet.

Neilich war i en dr Sauna. No hot's en dr Nebasauna en lauda Schroi doa ond a Frau isch rausgstocho komma. Beim Bademeischer hot se sich beschwert, dass se o'sittlich berührt worda sei. Des häb's en 15 Jahr, wo der Bademeischer do schafft, no nia gäh, hot'r gsait. Kurz druf duat's wiedr en Schroi ond die näggscht naggich Frau kommt aus dr Sauna raus ond beschwert sich beim Bademeischer, dass se o'sittlich berührt worda sei.

No hot dr Bademeischer selber noch em Reachta guckt. Wie er en d' Sauna neikommt, robbt do en naggicher Glatzkopf uf em Boda rom. Was er do zom doa häb, hot en dr Bademeischer gfrogt. Dodruf dr Glatzkopf: "I be beim Rasteiga gstolpert ond han Brill ond Toupet vrlora. Scho zwoimol han e's ghet, ond jedesmol war's plötzlich weg..."

Ihr

Wulf Wager